



23. marts 2022

UPA2022/162

**Uunga siunnersuut: Ilinniartut ineqarfii pillugit Inatsisartut Inatsisaata allanngortinnissaa pillugu Inatsisartut inatsisissaattut siunnersuut**

(Ilinniartitaanermut, Kultureqarnermut, Timersornermut Ilageeqarnermullu Naalackersuisoq)

Inatsisartuni Kulturimut, Ilinniartitaanermut, Ilisimatusarnermut Ilageeqarnermullu ataatsimiititaliaanni Inatsisartut ilinniartut inaannut inatsisaat ukioq kingulleq misissoqqissaarparput oqaluuseralugulu aamma suliamut atatillugu Ilinniartitaanermut Naalackersuisoq saaffiginikuuarput ullumikkut kinguneqartinneqartumik.

Siumumi isumaqarpugut ilinniartut erninerminnut atatillugu, ilinniangiffeqarallarnermi kollegianit anisariaqalertarnerat pitsaasuunngitsoq. Tassami ilaqutariinngortunut inoorlaamillu isumaginnittussanngortunut inigisamiik anisariaqalertarneq peqqinnartuunngilaq.

Siumumi inuusuttut amerlasuut ilinniagaqarnissaat tamatta anguniagaraarput ilinniartulli unitsitsiinnartartut eqqumaffigiuartillugit kollegianiik ernineq tunngavigalugu anisitsiinnartarneq naapertuutinngitsutut isumaqarfigaarput.

Aamma maluginiagassaavoq Ilisimatusarfimmi ilinniartut peqatigiiffiat, Pitaq, ilinniartut allagaanni Inatsisartut kollegianut inatsisaat pillugu oqallissaarinikummat. Inatsimmi §38 malillugu, ilinniartoq ilinniakkaminik unitsitsiinnarnermini kollegiamit anisariaqalersarnerat pillugu. Ilinniartut peqatigiiffiat isumaqarpoq inatsit naleqqussartariaqartoq, ilinniartoq angajoqqaanngornermini inimit anisariaqartarnera allanngortinneqartariaqarmat. Ilinniartormi naammassinnanni unikkallartariaqalissaguni, kollegiassaarunneq pissutigalugu ilinniakkamik aallartitseqqinngitsoorsinnaasarmat.

Meerartaaqqammersut meerartaamik isumagisussaanera pissutigalugu inissiamik nutaamik ujaasisariaqalertarnerat illersorneqarsinnaanngitsoq Siumumi isumaqarpugut.

Nalunngilluinnarparput kollegiassaaleqisoqarmat taamaattumillu nutaanik ilinniartut ineqarfiinik sanaartortuarnissaq pisariaqarpoq, taamaalilluni ilinniagaqarumasut tamarmik illoqarfimmut allamut ilinniagaqarfiusumut nuuttussat inissaqartinneqarsinnaaniassammata.

Siumumiik taamatut oqaaseqarluta siunnersuutip ataatsimiititaliami susassaqartumi aappassaaneerseqartinnagu suliarineqarnissaa innersuussutigaarput.

Doris J. Jensen